

Ku dhaqan Xafiis D.

FAAFINTA

الرسمية

OFFICIAL



RASMIGA AH

الجريدة

BULLETIN

EE JAMHUURIYADDA SOOMAALIYA

Sanadka 13aad

Muqdisho, 01 August 2026

Lr.3

Waaxda Maamulka Faafinta Rasmiga ah
Ee Xafiiska Garyaqaanka Guud ee Dawladda

FAAFIN BIL SOO BAXA

Qiimaha waa \$XXX Dollar, lambar waliba – **RUKUNKA:** Sanaddii waa \$XXX Dollar, Soomaaliya gudaheeda – Dibaddeedana waa \$XXX Dollar. Rukunka la weydiisto waqtiga loo gooyay wuxuu ka bilaabmaa 1 Janaayo. Qiimaha Qoritaanku F.R halkii sadar iyo wixii ka yar waa \$XXX Dollar – Rukunka iyo Qoritaanku waxaa la weydiistaa Laanta Maamulka Faafinta Rasmiga ah – Lacagta waxaa lagu bixiniyaa Xafiiska Canshuuraha ee Wasaaradda Maaliyadda.

KOBNIIN

BOGGA KOOWAAD

SHARCI

W.M

BOGGA LABAAD

XEER


BOGGA SEDDEXAAD

TALOOYIN, ISGAARSIIN, OGAYSIIS, IWM

BILAHA

March-July

2026



Xeer Ra'iisul Wasaare Lr.202

Taariikh: 09 /05/2026

XEERKA: XARUNTA ADEEGYADA MIDEYSAN EE HALMEEL



Ra'iisul Wasaaraha Xukuumadda JFS;

Markuu arkay: Dastuurka Jamhuuriyadda Federaalka Soomaaliya;

Markuu arkay: Go'aanka Shirka Golaha Wasiirrada ee summaddiisu tahay SHGW.11.151.4.26 ee 23/04/2026, kuna saabsan Ansixinta "Xeerka Xarunta Adeegyada Mideysan Ee Halmeel" oo uu Goluhu cod buuxa ku ansixiyay;

Markuu tixgeliyay: Muhiimadda Xeerkaan u leeyahay u fududeynta Dadweynaha Adeegga Dowladda

Wuxuu Meelmariyay

Oodobka 1^{aad}

Go'aan Gole

Go'aanka Shirka Golaha Wasiirrada ee summaddiisu tahay SHGW.11.151.4.26 ee 23/04/2026, kuna saabsan ansixinta Xeerka Xarunta Adeegyada Mideysan Ee Halmeel oo uu Goluhu cod buuxa ku ansixiyay.

Oodobka 2^{aad}


Hirgalin

Waxaa Xafiiska Ra'iisul Wasaaraha loo igmaday in uu hirgaliyo meelmariyana Xeerkan.

Qodobka 3^{aad}

Dhaqangal

Xeerkaan waxaa uu dhaqangalayaa marka uu saxiixo Ra'iisul Wasaaraha Xukuumadda Jamhuuriyadda Federaalka Soomaaliya, waxaana lagu soo saarayaa faafinta Rasmiga ah ee Dowladda.


Mudane, Hamze Cabdi Barre
Ra'iisul Wasaaraha Xukuumadda JFS



JAMHUURIYADDA FEDERAALKA SOOMAALIYA

XAFIISKA RA'IISALWASAARAH

XEER RA'IISALWASAARE Lr: ____ / 2026

Taariikh: ____ / ____ / 2026

Xeer: Xarunta Qaran ee Bixinta Adeegyada Mideysan (Halmeel)

Ra'iisalwasaaraha Xukuumadda Jamhuuriyadda Federaalka Soomaaliya;

Markii uu arkay:	Qodobada 116 ^{aad} , 119 ^{aad} , iyo 120 ^{aad} ee Dastuurka Jamhuuriyadda Federaalka Soomaaliya;
Markii uu tixgaliyey:	Baahida loo qabo in la mideeyo, la jaangooyo, lana casriyeeyo bixinta adeegyada dadweynaha si loo helo adeeg hufan, degdeg ah, daahfuran, kana jawaabaya baahiyaha muwaadiniinta;
Markii uu tixgaliyey:	Dadaallada Dowladda Federaalka ee ku aaddan dhijitaaleynta adeegyada, mideynta hannaanka maamulka, iyo horumarinta dowlad-wanaagga casriga ah;
Markii uu tixgaliyey:	Mas'uuliyadda Xukuumadda ee horumarinta adeegyada bulshada iyo xoojinta isla xisaabtanka;
Markii uu tixgaliyey:	Baahida loo qabo yareynta caqabadaha muwaadiniinta iyo ganacsiyada ka haysta adeeg helidda;
Markii uu tixgaliyey:	Wajjibaadka Guddiga Qaran ee Fulinta Dowladnimada Danabaysan ee uu magacaabay 8 Oktoobar 2025;
Markii uu tixgaliyey:	Tilmaamaha, hiigsiyada iyo awaamiirta ku qeexan Qorshaha Isbaddelka Qaranka 2025 - 2029

Isaga oo adeegsanaya awoodaha dastuurku uu siiyey, waxa uu soo saaray Xeerkan:

XEERKA: XARUNTA QARAN EE BIXINTA ADDEEGYADA MIDEYSAN (HALMEEL, 2026)

QAYBTA I: QODOBBO GUUD

Qodobka 1aad: Magaca Xeerka

Xeerkan waxaa lagu magacaabaa “Xeerka Xarunta Qaran ee Bixinta Adeegyada Mideysan, Halmeel.”

Qodobka 2aad: Qeexidda Erayada

Erayada hoos ku xusan haddii aan si kale loogu adeegsan Xeerkan dhexdiisa, waxaa loola jeedaa macnaha halkan ku qeexan:

1. Xeerka: Waxaa loola jeedaa “Xeerka Xarunta Qaran ee Bixinta Adeegyada Mideysan, Halmeel.”
2. Dowladda: Waxaa loola jeedaa Dowladda Federaalka Soomaaliya.
3. Agaasimaha Guud: Waxaa loola jeedaa Agaasimaha Guud ee loo xilsaaray maamulidda howlaha maalinlaha ah ee Xarunta Qaran ee Bixinta Adeegyada Mideysan.
4. Xarunta Adeegga Halmeel: Waxaa loola jeedaa xarun mideysa adeegyada dowladda ee kala duwan, lagana helo Halmeel oo ay ku jiraan adeegyada danabaysan, si muwaadinku uu u helo adeegyo kala duwan oo isku xiran.
5. Heerarka Adeegga: Waxaa loola jeedaa jaangooyinka lagu cabbiro adeegga (shuruudo, tallaabooyin, khidmad, iyo waqtiga ugu badan ee lagu dhammeynayo).
6. Axdiga Muwaadinka: Waxaa loola jeedaa dukumenti dadweynaha loo bandhigo oo qeexaya adeegyada, shuruudaha, khidmadaha, waqtiyada adeeg bixinta, iyo qaabka cabasho loo gudbiyo.
7. Doorsoocasho: Waxaa loola jeedaa tartanka shaqada ee furan, la xayeysiiyey, daahfuran ee ay muwaadiniintu u siman yihiin.

Qodobka 3aad: Aasaaska Xarunta Halmeel

1. Xeerkani waxa uu aasaasayaa Xarunta Qaran ee Bixinta Adeegyada Mideysan, ta oo hoos tagta Xafiiska Ra'iisalwasaaraha.
2. Xarunta Halmeel waxa ay u xilsaaran tahay isku duwidda, mideynta, jaangooynta, iyo horumarinta adeegyada dadweynaha ee Dowladda Federaalka, si loo xaqiijiyo bixinta adeegyo wax ku ool ah, hufan, daahfuran, isla markaana ku dhisan danaha iyo baahiyaha muwaadiniinta.

QAYBTA II: WAAJIBKA IYO SHAQADA

Qodobka 4aad: Waajibaadka Xarunta Halmeel

Xarunta Halmeel waxaa waajib ku ah:

1. Dib u habeynta iyo isku duwidda bixinta adeegyada Dowladda.
2. Aasaasidda, maamulka, iyo horumarinta Xarumaha Adeegyada Halmeel.
3. Jaangoynta habsocodyada adeegyada, foomamka, shuruudaha, iyo khidmadaha, si loo yareeyo kala duwanaanshaha addeegga ay hay'adaha Dowladdu bixiyaan.

4. Taageeridda adeegsiga adeegyada danabaysan ee Dowladda, iyada oo aan la dejin ama la baddelin heerarka farsamo ama siyaasadaha dhijitaalka.
5. Hagaajinta adeegga muwaadinka.
6. Adkeynta wadashaqeynta heerarka kala duwan ee dowladda, Federaalka, Dowlad Goboleedyada, iyo degmooyinka, ee jaangooynta adeegyada.
7. Soo saaridda, ansaxinta, iyo dhaqangalinta habraacyo, tilmaamo, iyo qaababka hawlgalka si loo mideeyo shaqada bixinta adeegyada dadweynaha.

Qodobka 5aad: Shaqada Xarunta Halmeel

1. Mideynta bixinta adeegyada;
 - a) Dhisidda madal is dhaafsi xogeed taa oo suurtagalineysa in Dowlad Goboleedyadu ay ku xirmaan hannaanka mideysan iyada oo la dhowrayo xogta;
 - b) Iskuduwidda adeegyada Dowladda iyo mideyntooda;
 - c) Dib u habeynta adeegyada adag iyo yareynta lakab xafiiseedka (ila meeraysiga);
 - d) Yareynta isku noqnoqoshada iyo habraacyada is khilaafsan;
 - e) Fududeynta xog is dhaafsiga u dhexeeya hay'adaha Dowladda si uu muwaadinku uga maarmo in uu hal xog marar kale duwan iyo meelo kala duwan ku bixiyo.
2. Xarumaha Adeegga Halmeel
 - a) Aasaasidda iyo maareynta xarumaha adeegyada urursan;
 - b) Ku mideynta adeegyada wasaarado/hay'ado kala duwan Xarunta Halmeel;
 - c) Hirgalinta xarumo negi iyo, marka loo baahdo, xarumaha guurguura ee degmooyinka fogfog.
3. Isla Jaanqaadsiinta Dowladaha
 - a) La shaqeynta Dowlad Goboleedyada iyo degmooyinka si loo jaangooyo habraacyada;
 - b) Taageeridda dhisidda karaanka shaqaalaha bixinaya adeegyada;
 - c) Kordhinta xarumo adeeg wadaag ah marka ay suuragal tahay.

Qodobka 7aad: Agaasimaha Guud

1. Agaasimaha Guud waxa uu ku imanayaa doorsoocasho - tartan furan, la xayeysiiyey, daahfuran, cadli iyo sinnaan ku dhisan.
2. Agaasimaha Guud waxa uu masuul ka yahay hoggaaminta, iskuduwidda, iyo kormeerka dhammaan hawlaha Xarunta Halmeel.
3. Agaasimaha Guud waxa uu warbixin joogto ah u gudbinayaa Ra'iisalwasaaraha.

Qodobka 8aad: Awoodda iyo Waajibinta Xarunta

Xarunta Halmeel waxa ay awood u leedahay:

1. In ay mideyso adeegyada la oggolaaday in lagu daro Xarumaha Halmeel iyada oo la raacayo jadwal hirgalin oo la isla meeldhigay.
2. In ay hagto dib u naqshadeynta habsocodyada adeegga si loo yareeyo tallaabooyinka aan loo baahnayn.
3. In ay soo saarto xeerhoosaadyo, habraacyo, iyo tilmaamo farsamo kuwaa oo lagu nidaaminayo bixinta adeegyada.

4. In ay kormeerto fulinta heerarka adeegga, isla markaana soo jeediso tallaabooyin maamul iyo saxitaan.
5. In ay ansixiso Axdiga Muwaadinka iyo heerarka adeegga ka hor inta aan dadweynaha loo bandhigin.

Qodobka 9aad: Shakhsiyad Qaanuuneed

1. Xarunta Halmeel waxa ay leedahay shakhsiyad qanuuneed.
2. Iyada oo ku shaqeynaysa magaca Dowladda Federaalka Soomaaliya, Xarunta Halmeel waxa ay awood u leedahay in ay:
 - a) gasho heshiisyo la xiriira mideynta adeegyada;
 - b) maamusho ama adeegsato hantida guurta iyo midda maguurtada ah ee Dowladda;
 - c) la shaqeyso hay'ado qaran, kuwo caalami ah, iyo kuwo gaar loo leeyahay, si waafaqsan sharciyada iyo xeerarka dalka.
 - d) Dhammaan waajibaadka sharciyeed ee Xarunta Halmeel waxay ku dhacayaan mas'uuliyadda Dowladda Federaalka Soomaaliya.

QAYBTA IV: SOCODSIINTA XARUMAHA ADEEGGA

Qodobka 10aad: Kala-soocidda Waajibaadka Hay'adaha

Si looga fogaado is-dulsaarka shaqooyinka, waxaa si cad loo kala saarayaa waajibaadka Xarunta Halmeel iyo hay'adaha Dowladda ee maamula dhijitaalka:

- Xarunta Halmeel:
 - Waxay bixisaa helitaanka adeegyada (service access)
 - Waxay fududeysaa isticmaalka adeegyada
 - Waxay isku dubbariddaa adeegyada iyada oo aan lahayn lahaansho ama maamul
- Hay'adaha Dowladda ee maamula dhijitaalka:
 - Waxay dejinayaan siyaasadaha dhijitaalka
 - Waxay maamulayaan kaabayaasha iyo nidaamyada
 - Waxay dejinayaan heerarka farsamo iyo is-waafajinta nidaamyada

Qodobka 11aad: Aasaasidda Xarumaha Adeegyada Halmeel

1. Xaruntu waxay mideynaysaa adeegyada mudnaanta leh, oo ay ka mid yihiin (balse aan ku koobnayn):
 - a) Aqoonsiga/diiwaangalinta madaniga ah iyo ajaanibta;
 - b) Baasaboorka iyo dukumentiyada safarka;
 - c) Shatiyada maalgashiga, ganacsiga iyo canshuuraha;
 - d) Dukumentiyada waxbarashada iyo shahaadooyinka;
 - e) Adeegyada ilaalinta bulshada;
 - f) Warqadaha dembi-la'aanta;
 - g) Maamulka dhulka;
 - h) Ruqsadda gaadiid wadida
 - i) Diiwaangalinta gaadiidka
 - j) iwm.

2. Wasaaradaha iyo hay'adaha bixiya adeegyadan iyo kuwa la midka ah waxa ay geeynayaan Xarunta Halmeel shaqaale shaqada qabta ka dib marka la hubiyo diyaargarowga Xarunta.

Qodobka 12aad: Heerarka Adeegga, Daahfurnaanta, iyo Cabashooyinka

1. Xarunta Halmeel waxa ay diyaarinaysaa Axdiga Muwaadinka oo caddeynaya shuruudaha, khidmadaha, talaabooyinka, iyo waqtiga adeeg bixinta kaa oo la dhigayo meel muwaadinku arki karo;
2. Xarunta Halmeel waxa ay hirgalinaysaa hannaan lagu xalliyo cabashooyinka la xidhiidha adeeg bixinta si muwaadinku uu jawaab ugu helo cabashooyinkiisa;
3. Si loo yareeyo musuqmaasuqa iyo faragalinta aan loo baahnayn, Xarunta Halmeel waxa ay hirgalinaysaa nidaamyo yareeya kulamada iyo xiriirka fool-ka-foolka ah ee aan lagama maarmaanka ahayn;
4. Xaruntu waxa ay si joogto ah xogta dakhli ururinta iyo hufnaanta adeeg bixinta ugu soo gudbinaysaa Xafiiska Ra'iisalwasaaraha;
5. Xarunta Halmeel waxay bixinaysaa adeegyo danabaysan oo dhammaystiran kuwaa oo u sahlaya muwaadiniinta, qurba-joogta iyo ajaanibtaba in ay helaan adeegyada ay u baahan yihiin iyaga oo isticmaalaya aqoonsiga qaranka iyo baasaboorada si waafaqsan Hannanka Hal-koonto (Single Sign on);
6. Kaabayaasha farsamo iyo nidaamyada ay adeegsanayso Xarunta Halmeel waa inay noqdaan kuwo dowladda Soomaaliyeed ay leedahay, si loo dhowro amniga qaranka iyo xogta muwaadiniinta, loogana hortago ku tiirsanaanta shirkado shisheeye;
7. Dhisidda hal daaqaad oo si gaar ah loogu talagalay ajaanibta iyo maalgashadayaasha si loogu fududeeyo helidda dukumintiyada dowladeed, deganaanshaha, iyo oggolaanshaha ganacsiga.

QAYBTA V: GUNAANAD

Qodobka 13aad: Dib u eegis

Xeerkan waxaa dib u eegis lagu samaynayaa markii loo baahdo.

Qodobka 14aad: Dhaqangal

Xeerkani waxa uu dhaqangalayaa marka uu ansixiyo Golaha Wasiirradu, Ra'iisalwasaaruhu saxiixo, laguna soo saaro faafinta rasmiga ah ee Dowladda.

Md. Xamze Cabdi Barre
Ra'iisalwasaaraha Xukuumadda
Jamhuuriyadda Federaalka Soomaaliya